

榮縣志



榮縣志

秩官第十

秩官者凡治其地曰官。官各事其職。有秩也。青陽遠矣。漢縣萬戶以上爲令。減萬戶爲長。華陽國志有南安將軍張表。字伯達。成都人。松之子也。永元八年。南安長扶風王君平鄉明亭大道。遣掾何童史道興修治有碑。不知王君何名也。晉阮孚爲南安縣侯。則江左遙置郡縣。梁蕭方矩爲南安縣侯。則自義熙分立治官。榮與南安判矣。

晉

何觀。華陽國志。何隨傳。長子觀。字巨忠。清公淑慎。知名。

州里。察孝廉。西都南安令。省志。觀郛人。

隋

隋制。鎮置將。開皇十三年。大牢鎮改大牢縣。縣分九等。置令丞尉。煬帝時。以所管閑劇及衝要爲等級。丞主簿如故。而號令日改。官名月易。史亦稱闕文。不可備知矣。衛玄。字文昇。本傳。河南洛陽人。周拜益州總管長史。賜萬釘寶帶。隋仁壽初。爲資州刺史。山獠圍攻大牢鎮。玄單騎撫安之。煬帝立。徵爲衛尉卿。夷獠攀戀。數十里不絕。按當時。刺史帶諸軍事。大牢隸資州。鎮已爲縣。玄不逞殘殺。則亦功德在民也。煬帝改州爲郡。故地理志作

資陽郡。

袁天綱。舊唐書方技傳。天綱。益州成都人。工相術。隋大業中。爲資官令。按地理志。無資官縣。或因大業二年。以十使省併天下州縣故也。

唐

唐制。武德初。有行臺。大行臺。置總管以統軍。九年六月。改總管爲都督。十州一大都督。州分上中下。武德元年。改太守曰刺史。加使持節。上元二年。諸州別駕。以諸王子爲之。景雲二年。始參用庶姓。天寶元年。又改刺史曰太守。縣令亦分上中下。丞主簿尉同。方隋開皇時。戶口

滋多。析置州縣。大業中省併之。唐興。豪桀據地來歸者。爲之割置州縣。故其多數倍於隋。貞觀三年。以民少吏多。大加省併。如十道志數。

樊偁。文苑英華載蘇頌典制文云。黃門大中大夫。前守榮州都督。借紫金魚袋。上柱國。樊偁。早負文詞。累遷省闈。頃揚才智。受任軍州。敏以要功。斷而臨事。義眉作鎮。龍靈開國。惟巴蜀之險。接西南之夷。式遏撫循。尤擇時望。端寮副職。俾承相委。可行益州大都督府司馬。餘如故。仍知蜀州防禦副使。卽馳驛赴任。

韋玠。北齊韋粲玄孫。榮州刺史。

柳奭字子燕高宗朝王皇后之舅也永徽中后寵衰由
同中書門下三品罷爲吏部尚書六年六月武昭儀誣
后厭勝奭遂貶遂州旋貶榮州刺史顯慶二年八月許
敬宗希武后旨誣奏由榮州貶象州在榮經兩寒暑新
舊二年。

于志寧字仲謐高陵人顯慶四年八月因武后所銜由
同中書門下三品出爲榮州刺史。
韋縠長安三年見大周聖德碑。

薛高邱開元二十年有榮德山磨崖碑。
張佺舊志安聚橋卽古靈濟橋唐貞元中張刺史所造

也。

臧公明。吳縣趙均字靈均。著金石林三原縣臧公墓碑。
曾官榮州刺史。

陳雷。元和中任。王源茂。榮州刺史。武后相方慶玄孫。

李弘度。甯王玄孫。見世系表。段諤。穆宗相文昌之

父。成式之祖。于盾。榮州刺史。憲宗相頤之孫。

已上刺史

王如珪。舊志京兆人。從僖宗入蜀。授和義令。按王興孫墓志。其先長安人。唐末有知珪者。爲榮州和義令。秩滿遂家於榮。則如珪或知珪之譌也。

馮昭泰。字遇聖。長樂人。起家左奉裕。累調滎州長史。屬城慢法。按而繩之。入計會府。仇家橫訟。明敕杖其愬者。遷宋州司馬。積至睦州刺史。復以羣小譖。貶滎州司馬。砥節荒服。旋除溫州長史。俄拜括州刺史。景龍中卒。見張燕公文集。

王璲。滎州都督府倉曹參軍。

已上令佐

高滿政。武德六年六月。封滎國公。

李承突。章懷太子之孫。承寧。卽承突弟。均爲滎王諮議參軍。

榮王琬。玄宗第六子也。開元十三年封榮王。風格秀整。有素望。安祿山反。爲征討元帥。中外倚之。會薨。生男女五十八人。

榮王愼。憲宗二十子。咸通三年封。廣明初拜司空。

王已上封階

五代

趙延進。澶州頓邱人。榮州刺史。

王景崇。劉漢時爲平鎮將。以功領榮州刺史。

賈武庫。廣政中任。見武安公廟碑。

史光廷。眉山人。孟蜀時試大理評事。知應靈縣。見山谷

史詩老墓志。

仲廷預爲嘉王宗壽師。天寒王府以故火器給學院。廷預以箸畫灰得金火箸二。事遽求見。出金箸衷中。述本末。宗壽曰。吾家失此物十年矣。公不妄取。真古人也。薦授榮州錄事參軍。

榮王宗智前蜀武成三年封。

宋

宋制州分節度防禦團練刺史四等。節度三品州也。防禦團練四品州也。刺史五品州也。開寶中一州止一刺史一司戶。自後有推官有通判。而監庫監酒權稅算。又

增四員。曹官之外更益司理。而官多矣。

王明字如晦。大名成安人。乾德初。詔公卿近臣各舉清白有吏幹者一人。給事中馬士元以明塞詔。蜀平。選知榮州。後官至禮部侍郎。淳化二年卒。按乾德元年。初以文臣知州事。傳所謂詔舉吏幹也。三年。蜀主孟昶降。傳所謂選知榮州也。代歸。遷右補闕。爲荊湖轉運使。至開寶三年。南征。爲隨軍轉運使。通計五年之間。由榮遷轉要職者三。是宋開國第一官榮者明也。

劉蔚。開寶三年。以祕書丞知榮州。平陽句延慶。昌裔。著錦里耆舊傳。蔚謂其詞蕪穢。請延慶修之。改成都理亂。

記。天成之後。別加編次。起咸通九年。迄乾德四年。百餘年閒。蜀事大略具矣。見書錄解題。

劉兼。長安人。得宋刻唐百家詩。有兼集。澠水燕談。太祖曾詔兼等修五代史。又兼有長春節詩。知五代人而入宋者。爲滎州刺史。初至郡界云。嘉陵江畔接滎川。兩岸旌旗下瀨船。郡印已分炎瘴地。朝衣猶惹御鑪煙。蓮塘小飲香隨艇。月榭高吟水壓天。錦字莫嫌歸路遠。華夷一統太平年。按首句誤。登郡樓書事云。偶奉綸書莅旭川。郡樓嘉致盡依然。松欹鳥道雲藏寺。月滿漁舟水浸天。望帝古祠花簇簇。錦城歸路草芊芊。有時倚檻垂雙

淚。故國風光似眼前。到郡後寄西川從弟舍人右司閣
郎中齋殿院云。蜀路新修盡坦平。交親深幸再逢迎。正
當返袂思鄉國。卻似歸家見弟兄。霑澤只慙堯綬重。沂
流還喜范舟輕。欲將感戀裁書旨。多少魚箋寫得成。郡
齋寓興云。依約樊川似旭川。郡齋風物盡蕭然。秋庭碧
蘚鋪雲錦。晚閣紅蕖簇水仙。醉筆語狂揮粉壁。歌梁塵
亂拂花鈿。清懷放蕩無羈束。地角天涯亦信緣。按以樊
川況旭川。所見今西門外坦也。紅蕖句指今佛池。郡樓
閒望書懷云。郡城樓閣繞江濱。風物清秋入望頻。銅鼓
祭龍雲塞廟。蘆花飄市雪黏人。蓮披淨沼羣香散。鷺點

寒煙玉片新。歸去杜陵池館在。且將朝服拂埃塵。按郡樓今西城。古刺史署在此。去年今日云。去年今日到滎州。五騎紅塵入郡樓。貔虎只知迎太守。蠻夷不信是儒流。姦豪已息時。將泰疲瘵全。蘇歲又周。聖主若容辭重祿。便歸烟水狎羣鷗。春游云。搖搖離緒不能持。滿院花開酒熟時。羞聽黃鶯求善友。強隨綠柳展愁眉。隔雲故國山千疊。傍水芳林錦萬枝。聖主未容歸北闕。且將勤儉撫南夷。酬句評事云。閒庭欹枕正悲秋。忽覺新編浣遠愁。才薄只愁安雁戶。注。夷人內有雁戶。蓋徙移不定之故也。年高空憶復漁舟。鷺翹皓雪臨汀岸。蓮嬋紅香市郡樓。對景卻慙

無藻思。南金荆玉卒難酬。旭川祁宰思家而卒。因述意
呈秦川知己云。歲稔民康絕訟論。政成公暇自由身。朝
看五馬閒如社。夜擁雙姬煖似春。家計不憂憑冢子。官
資無媿是朝臣。豈同齷齪祁員外。至死悲涼一婦人。西
齋云。西齋新竹兩三莖。也有風敲碎玉聲。莫恨移來欄
檻遠。譬如元本此閒生。重陽感懷云。重陽不忍上高樓。
寒菊年年照暮秋。萬疊故山雲總隔。兩行鄉淚血和流。
黃茅莽莽連邊郡。紅葉紛紛落釣舟。歸計未成年漸老。
茱萸羞戴雪霜頭。春宴河亭云。柳擺輕絲拂嫩黃。檻前
流水滿池塘。一筵金翠臨芳岸。四面煙花出粉牆。舞袖

逐風翻繡浪。歌塵隨燕下雕梁。蠻箋象管休凝思。且放
春心入醉鄉。春晚寄懷云。一承兌澤泣方州。八度春光
照郡樓。好景幾將官吏醉。名山時便管弦游。空花任爾
頻侵眼。老雪從他漸滿頭。歸去杜陵池閣在。只能歡笑
不能愁。送二郎君歸長安云。我兒辭去淚雙流。蜀郡秦
川兩處愁。紅葉滿山歸故國。黃茅徧地住他州。荷衣曉
挂慙官吏。菱鏡秋窺訝鬢髩。好向雲泉營舊隱。莫教莊
叟畏犧牛。偶聞官吏舉請寄從弟舍人云。官吏潛陳借
寇詞。宦情鄉夢兩相違。青城錦水無心住。紫閣蓮峯有
意歸。張翰鱸魚因醉憶。孟光書信近春稀。黃茅瘴色看

看起。貪者猶疑別是機。

劉通

王韶熙寧中。王韶字子純。鑿空開邊。用兵有機略。遂以熙河作路。河岷作州。贈金紫光祿。諡襄敏。初不言知榮州。舊志云。太宗時。自別一人也。

張泌。常州武進人。登南唐進士第一。官內史學士。後從李後主歸宋。太祖聞其清節。授贊善大夫。擢知榮州。見鄒浩文集。

張樞。官祕書丞。淳化五年。十二月。坐知榮州降賊棄市。見太宗本紀。